

TUI'UMI: NA IA FASIOTI TAMAFIIGA

Aleni Sofara, Iunivesite Aoao o Samoa

Faamatalaga

O lenei tusitusiga e faamatalaina ai le faaumatia o le alii logologoā o Tamafiiga mai le nuu o Manono, ma e faamatalaina ia mau mai faamaumauga a sulii ma le aiga o Aiono Faapologaina i Matavai i Fasitoo-uta. O nei foi faamatalaga ua lagolagoina e Tupua Tamasese Efi i le tusi o le 'Su'esu'e Manogi,' e faavae i faamaumauga ma faamatalaga lautele ma tala tuu-faasolo ma mau a lenei aiga, e aofia ai foi mai isi tusitusiga ua mafai ona faamauina. E faaopoopo i ia faamaumauga, ua i ai foi ni isi o faaiuga a le Faamasinoga o Fanua ma Suafa e lagolagoina ai lenei tusitusiga. O lenei foi tusitusiga e faatau ai le sao o le tala faasolopito o le taunuu mai i Samoa o tala'iga a le lotu Uesiliana i le 1828 ma le Lonetona Misionare Sosaiete i le 1830 lea na mua'i ta'ua o le lotu Toga mulimuli ane ua ta'ua o le Ekalesia Metotisi ma le lotu Ta'iti lea ua igoa nei o le Ekalesia Faapotopotoga Kerisiano i Samoa.

Upu ia matauina: fasioti, taupulepulega, fasiotia, Tamafiiga

Faatomuaga

Ina ua mavae le tuumalo o Tafa'ifa l'amafana o Sa Tupua i le 1802, lea ua ta'ua e le tusitala o Kilisone (Gilson) e faapea ua faaoga ma faavevesi e Tamafiiga mai le nuu o Manono, le aiga Sa Tupua ma le Aiga Sa Malietoa ma ia faatupu feeseesea'iga, ae mulimuli ane ua maua ona ia umia ma pulea le suafa Tafa'ifa. I ia feeseeseaiga, o i tonu lava na saofia ai ona fau e Tamafiiga lana pulega ma ia faailoa ai o ia o le Tupu Tafa'ifa o Samoa. O Tamafiiga o se tagata lauiloa i na ona aso, e le gata o ia o se tagata, ae toe toe temoni, pe itulua foi. Sa iloa foi e le toatele o tagata Samoa o Tamafiiga o se "aitu" ona ana faiga matautia ma ana pulega sau. E le tele nā'uā ni faamaumauga o maua i lenei vaitaimi e faatatau ia Tamafiiga a'o le'i taunuu mai Misionare, e le tele na'ua foi ni tusitusiga e uiga i le fasiotia o Tamafiiga.

O le tele o tusitusiga ua mafai ona faamauina i lenei vaitau o loo atagia ai e mafuli tusitala i le faapea mai o le fasiotia o Tamafiiga na afua i taupulepulega a taulele'a o Fasitoo-uta. A'o le isi tusitusiga o loo faapea mai o taulele'a lava o Fasitoo-uta na o latou fasiotia ia Tamafiiga. Ae e i ai foi le isi tusitusiga o loo faapea mai o Tamafiiga na fasiotia e taulele'a o Fasitoo-Tai. I ia lava mau, e foliga mai e tasi le tusitala ae eseese ana faamaumauga, lea e fai mai le isi tusiga o taulele'a o Fasitoo-Tai, ae fai mai le isi tusiga o Fasitoo-Uta, ua fesiligia ai le sa'o o ia tusitusiga ona o le mau o loo faavae ai le tusiga lenei: o le suafa Aiono e mai Fasitoo-uta, o lē na ia fasioti Tamafiiga o le tagata Fasitoo-uta foi, ma o Fasitoo-uta foi le nofoaga na fasiotia ai Tamafiiga.

O le tele o ia tusitusiga e foliga mai o le fasiotia o Tamafiiga o ni taupulepulega na fafau faatasi, a'o isi mau o loo faapea mai, o taupulega fai faatasi a taulele'a o Fasitoo-uta ma taulele'a o Faleasiu. Ae fai mai isi tusitusiga, o taulele'a uma lava o Aana. O lona uiga, o le gagana lautele o loo molimau ai ia tusitusiga i le fasiotia o Tamafiiga e taulele'a o Fasitoo-uta ma Faleasiu ma Aana uma. Ae peitai, ua le mafai lava ona faamatalaina mai i ia tusitusiga pe amana'ia foi le tautua malo, le saili malo lea ua maua ai malo, e ala i le toa, le lotu tele, le lē fefe ma le ositaulaga a le tagata tonu na amatamea e tapena le faaumatiaina o Tamafiiga, le tagata tonu na fuafuaina le osofa'ia o Tamafiiga, le tagata tonu lava lea na ositaulaga i lona afafine ina ia tosina ma maileia mai ai Tamafiiga, le tagata tonu lava lea na faataoto atoa le tapenaga o le osofa'ia ma le fasiotia o Tamafiiga, o ia lava lea o Aiono Ma'ipipili, ua igoa foi o ia o Tui'umi. O lona uiga, o le mau a le tusitala, e ono fesiligia le sa'o o isi mau, vagana ai le mau maumaututu ua manino nei, o Aiono Ma'ipipili o Matavai i Fasitoo-uta na ia fasiotia ia Tamafiiga.

O isi tusitusiga e foliga mai e fesootai le tulagaese o le fasiotia o Tamafiiga aga'i i mau ua faapea mai, ua avea le fasiotia o Tamafiiga ma auala o le lē faalavelaveina o le galuega tala'i a le Misionare LMS o Ioane Viliamu ma le Savali o le Filemu, ua mafuli foi ia mau i le molimau o le Tala Lelei ma le faa-Kerisiano i Samoa, ae aunoa ma ni faamaumauga e afea'ina ai le tagata tonu na ogatotoungalemu i ai tapenaga ma le osofa'ia, atoa ai ma le faaumatia o le aitu sau o Tamafiiga.

O le tusitusiga lenei o le a taula'i tonu lava ia Aiono Ma'ipipili, ua igoa foi o ia ia Tui'umi, le tagata tonu lava lea na faia le tapenaga ma faatino le faaumatia o Tamafaiga. E sailiili foi lenei tusitusiga i faamaumauga o i ai i isi foi tusitusiga ua maea ona lolomiina ma tau faatusatusa ina ia mafai ona lagolagoina ma faamaonia nisi mau a le Tusitala, faapea nisi o mau faa le aiga, faatasi ma le nuu poo nuu foi ua ta'ua e maualafia ai ona manino lenei tusitusiga ma lona faamatalaina. O lenei foi tusitusiga o le a faasoa atu ai e uiga i le soifuaga ma le talaaga o Tui'umi – le tagata tonu lava lea na ia fasioti ma faaumatia le tagata logologoā—e aitu, a'o le tagata foi, o lona uiga e itulua, o Tamafaiga.

O ai na ia faaumatia Tamafaiga?

E sa'o faamaumauga o loo i le tusi na tusia e Tuiatua Tupua Tamasese Taisi Efi ua igoa o le "Suesue Manogi" o loo ta'ua ai o Aiono Ma'ipipili na fasiotia ia Tamafaiga, ma o loo ta'ua ai le isi ona igoa o Tui'umi. O Ma'ipipili o le atalii o Folasaitu Ape Tapuvaelala o Fasitoo-uta, o le suli o le suafa Aiono mai le Itupaepae o Aiono Tuala i Matailili, o le isi lea fuaiala o le nuu o Fasitoo-uta. O le Tina o Ma'ipipili o Tātā, e mai le nuu o Fogapoa. Na faae'e le suafa Aiono ia Ma'ipipili ina ua ia talia ma ia ioeina le 'anau atu a le nuu o Fasitoo-uta mo se fesoasoani ona ua mapuitiga le nuu, ua ogaoga le oi ma le pologa talu le sauā o Tamafaiga. O Aiono Ma'ipipili le ulua'i Aiono Tuala na nofoia Matavai i le pitonuu ogatotonu o Fasitoo-uta ua igoa o Matā-avano. Ma o Matavai tonu lava lea na filifilia e Aiono Ma'ipipili e osofa'i ma faaumatia ai Tamafaiga.

O le faauigaina o le igoa o Ma'ipipili: o le 'ma'i - toe pipili. O le talitonuga lautele lea o le uiga o le igoa Ma'ipipili i le mau a tagata o Fasitoo-uta faapea foi ma tagata o le aiga o Aiono Tuala. Ua talafeagai le igoa pe a fua i le taimi na fanau mai ai Ma'ipipili o se pepe e matuā lapo'a tele lava. Ae le gata i lea, i lona fanau mai, na manatu lava le toatele ailoga a mafai ona savali lenei pepe ona ua maoa'e tele le telē o lona tino ma lona umī nā'uā, ma e matua tulaga ese lava. O popolega foi na i ai pe faamata e gafatia e ona vae ona tau'ave lona tino ua matuā telē lava, e tauau ina ola a'e e ma'i toe pipili. Ona o ia manatunatuga i le tino telē toe umī o le pepe, atoa ai ma le tau le mafai ona savali ae na o le totolo na mafua ai ona faaigoa o Ma'ipipili. Peita'i, e sese uma lava ia manatu ma mafauauga. Aua foi, na ola a'e le tama o Ma'ipipili o se tamaititi ola maloloina, tino tele, e tupu laulauā toe umī, lea e mafua ai le isi ona igoa valaau o Tui'umi, o lona uiga, o le umī e gata ai umī.

I tala faamaumauina, ona finagalo lea o Folasaitu Ape Tapuvaelala e faafoi Tātā i lona nuu o Fogapoa ona ua mafana le mafutaga ma fia faiavā i le isi foi tamaitai A'ana o Taufauaifoia'ana e fai ma ona faletua lona lua O lea na aloa'ia lelei ona toe momoli si fafine o Tata i lona aiga i Fogapoa e tusa o tu ma aga faa-Tamalii a le atunuu Tamalii i ia ona aso.

E iloga lava foi tu ma aganuu mamalu a Samoa e faatatau i usuga ma aumoega a Tupu ma Tamalii o Samoa, pe a finagalo e faafoi le toalua ae fia fai usuga i isi tamaitai poo isi foi fafine. A oo lava i le taimi ua mana'o le Tupu poo se Tamalii ua fia sui lona faletua, pe fautuaina foi e Tulafale a le Tupu poo le Tamalii le tataua ona fai se isi usuga, e ao lava ona momoli aloa'ia le faletua ua lē toe manaomia i lona aiga. E le momoliina gūgū foi, auā o aga masani, e ao ina momoli faatasi ma faaaloaloga atoa ai ma oloa ina ia malu le va o aiga, faapea le va o nuu. O se tu ma se aganuu e taugata tele lona faatinoina.

E talitonuina na malamalama lelei lava Tātā i aga ia a Tamalii o le atunuu, lea foi la ua liliu le finagalo o Folasaitu Ape Tapuvaelala e fia fai usuga i le isi tamaitai ese mai lo ia, ma ua alaga-tatau ai lava ona foi i lona aiga. Na momoli aloa'ia ai lava Tātā i lona aiga i Fogapoa i Savaii, faatasi ai ma lana tama o Ma'ipipili. Soo se tamaitai Samoa i ia ona aso, sa manino ma malamalama lelei i faiva o faiga-usuga a Tupu ma Tamalii o Samoa, pe a finagalo lava latou e sui o latou taitoalua.

I le toe faafoi ma le momoliina o Tata i lona aiga i Fogapoa, na faapea ona ola a'e ai ma Maipipili lana tama i Fogapoa lava. O Fogapoa foi lea na fe'au ai e le Sa'o o le Aiga ma le nuu o Fasitoo-uta, le susuga a Aiono Lulu ia Maipipili mo lana fesoasoani ua moomia tele e lona nuu o Fasitoo-uta ma Aana uma ona ua maoa'e tele le sauaina o le nuu e Tamafaiga, ae maise o osofa'iga a tagata Manono ua matua ogotia le nuu ona ua leai lava se isi na te faafetaui lea malosi, ae maise ua leai se toa na te agaia le matautia o Tamafaiga ma tagata Manono. O le malosi o ia osofa'iga a Tamafaiga ma tagata Manono

na i'u ai ina taa-vao, sosola i le vao ma lalafi i le vao tagata o Fasitoo-uta, ona o faiga a Tamafaiga ma ana 'au, soo se fale e tau atu ai ua susunu, o mea toto ma mea fafaga ua faatama'ia, soo se tagata Fasitoo-uta poo Aana e tau atu ai e fasia lava pe faaumatia foi.

O Maipipili, o le suli moni o le suafa Aiono.

O Maipipili, o ia lava o le suli moni o le suafa Aiono. I faamaumauga o faaiuga mamalu a le Faamasinoga o Fanua ma Suafa Samoa o loo mafai ona faamaonia ai le gafa o Aiono Tuala o Matavai o loo ta'ua i ia faaiuga e faapea:

- Folasaitu Ape Tapuvaelala o Mataiili/Fasitoo-uta na usu ia Tata o se tamaitai mai le nuu o Fogapoa/Savaii faae'e le gafa o Maipipili lea na igoa ia Tuiumi. O lona igoa o Tuiumi e mafua ma fesootai ma lona umi tele, tino telē ma le maualuga.
- O le usuga lona lua a Folasaitu Ape Tapuvaelala na usu ai ia Taufaunaifoia'ana le alo o Laumatiamanu o Matanofa/Falelatai ona faae'e lea o le gafa o Tuilava'i.
- O Tuilava'i na ola a'e lava i Matavai/Fasitoo-uta ma na usu ia Masu le alo o Touli i Saleilua/Falealili faae'e le gafa o Faapologaina. O Faapologaina lea na ia umia le suafa Aiono o Matavai ina ua tuumalo Aiono Maipipili.
- O Aiono Faapologaina na usu ia Luisa le alo o Faagata i Fagatogo/Amerika Samoa faae'e le gafa o Siatu, Ui, Faasua ma Maotua. O Siatu na ia tauave le suafa Aiono o Matavai ina ua tuumalo Aiono Siatu.

A silasila i le faasologa o nofo, o le uluai Aiono i Matavai o Aiono Maipipili i le usuga muamua a Folasaitu Tapuvaelala ia Tatā, ona sosoo ai lea ma Aiono Faapologaina i le usuga lona lua a Folasaitu Tapuvaelala ia Taufaunaifoia'ana le alo o Laumatiamanu o Matanofa/Falelatai, sosoo mai ai lea ma Aiono Siatu, ma o loo tauave mai ai lava e suli o Aiono Faapologaina auga nofo o le suafa Aiono i Matavai/Fasitoo-uta e oo mai i nei ona aso.

O le alii lenei o Maipipili.

Ina ua toe momoli ma faafoi Tatā i lona nuu o Fogapoa, na faapea ona ave atu ai faatasi ma Maipipili lana tama, ma faapea ona ola a'e ai ma tuputupu ane ai ia Maipipili i Fogapoa lava i le aiga lea o lona Tina. E ui i le toe foi ma nof mai ai i Fogapoa, ae sa fesootai pea Maipipili i le aiga o lona Tama i Fasitoo-uta. I le ola tuputupu a'e o Maipipili i Fogapoa ua iloa ai o ia o se tagata tino lapo'a, umi toe maualuga lava. Na faaauu pea lona igoa valaau o Tuiumi e tagata o lona nuu ma lona aiga ona o lona umi tele. Ae o ia foi o se tagata e amio tauagafau, o se tagata atamai tele foi, e le o se tagata na te faamata'u pe faafefe se isi i lona tino tele ma le maualuga, e agamalu foi ma filemu lava o ia, ae le o se tagata e pala'ai. O le faatusatusa o lona umi pe tusa o le 7 futu ma le 3 inisi.

O loo lagomau Aiono Maipipili i Matavai i Fasitoo-uta, ae na faamaonia le umi ma le tino tele ina ua laga lona tuugamau ina ua liutofaga i latou na lagomau i le fanua lenei o Matavai. Na finagalo le Sa'o o le Aiga i Matavai i le 1991 Susuga Aiono Faapologaina Leulumoega Sofara o le a fausia se Maota fou o le aiga i Matavai, na poloaina ai le liutofaga uma o tagata o le aiga i luga o le fanua o Matavai ina ia maualafia le tulaga ua i ai nei lea maota. O le faatinoga o le liutofaga na vaai tino ai le toatele o le aiga i le auivi ma ponaivi o Aiono Maipipili o se tagata umi tele toe maualuga.

I le faatinoina o lea foi tu mamalu a Samoa i le lagaina o tuugamau ma le liutofaga, na matauina tu ma aga faa-Fasitoo-uta. E le aafia le aiga, ae o le tofi lea o tulafale o Fasitoo-uta lea e faalupe o le Falefitu, o i latou ma taulele'a o le nuu e lagaina le tuugamau, auā o Aiono o lo latou Ali'i lea. O le Falefitu na o latou tu'i le tuugamau, o le Falefitu na lagaina auivi ma ponaivi mai tuugamau ma momoli i le maota, ona sagai ane lea o tama'itai o le aiga (Sa Fuatinō) e fufulu ma faataele ponaivi uma, atoa ai ma le u'uina i le fagu'u. E tapu se isi o le Falefitu ona soli le maota, vagana ai le tapuaiga ma le leoina o le maota i fafo ane a'o alo Sa Fuatinō e fufulu ma faataele ma uuina ponaivi uma, ma afifi loa i le siapo. O lenei foi tu ma le aga o le liutofaga e le se aganuu e taugofie, aua foi, a maea le liutofaga, ona alo lea o le aiga e fai faaaloaloga mo le nuu ma faataumamafa le nuu ma tali-toga o le Falefitu.

O le tapenina o le osofa'iga

Na talia e Maipipili le talosaga ma le augani a le Sa'o o le Nu'u ma le Aiga o Aiono Lulu ona ua pagatia le nuu ma ua ola le nuu o Fasitoo-uta ma Aana i se olaga matata'u ona o le malosi o osofa'iga ma sauaga a le alii o Tamafaiga. O le taimi tonu lea ua le mafai lava ona faafetauia e se tagata o Fasitoo-uta ma Aana le matautia o Tamafaiga, a ua atili ai ona faatetele ana sauaga i le nuu, ua leai se toe poi o Tamafaiga, ua matua leai se alofa i le faatinoina o lona sau matautia. O le talia e Maipipili o le augani a le nuu o Fasitoo-uta, o lona uiga, toe pau foi lea o le faamoemoe o le nuu, o lo latou ola ma le lumanai o Fasitoo-uta ua faalagolago uma nei ia Maipipili. Ae maise ai ua tele tausaga o pologa le nuu ma Aana, o lo latou toe faamoemoega lea ina ia saoloto mai ai i pulega sau ma le alofa a Tamafaiga, o lo latou ola filemu ma le saoloto ua i lima nei o Maipipili.

Ua iloa e tagata o Aana ma Fasitoo-uta ua le o toe mamao ona agai mai foi lea o le fuava'a o alia ma vaaalo a Tamafaiga ma lana aumalaga mai Manono e agai atu i Laulii, ma e mautinoa lava e ui mai i le gataifale o Aana ma Fasitoo-uta ma na manatu lava e ono afea foi Fasitoo-uta. Na mautinoa lelei e tagata o Aana ma Fasitoo-uta uiga leaga o Tamafaiga, e le gata i le sau i tagata, o le fasiotia o tagata, susunu ma faaumatia fale o aiga, ae maise ai o le faatautala i ava a matai ma teine o nuu. Ua iloa lelei lava e le vaoia lava e se tagata se fafine, tamaitai poo teine muli lava e manao Tamafaiga la te momoe, e le vaoia lava e se tasi. Soo se tagata e faalavelave i le manao o Tamafaiga pe a oo i ona manaoga tau tamaitai, o le tagata lava e faalavelave, e faaumatia ma fasiotia.

I le mautinoa ai e Maipipili o le a malaga mai Tamafaiga e agai i Laulii ma e ui mai lava i le gataifale o Fasitoo-uta, ua amata loa ona tapena le faatinoga o le osofaiga e faasaga ia Tamafaiga. Na aami e Maipipili lona afafine o Leuteifuiono a'o i ai i Fogapoa ina ia sau i Fasitoo-uta. Ua manatu lava Maipipili o le a faaoga le teine muli ma le lalelei o lona afafine o Leuteifuiono e maileia mai ai le tu'inanau o Tamafaiga i tamaitai, ina ia momoe Tamafaiga ma faiaiga ma Leuteifuiono, ae o le a mauafia ai ona faia le osofa'iga ma faaumatia ai le fili. O le oagatotonugalemu tonu lava lea o le tapenaga ua faia. I le gagana faigofie, ua ositaulaga Maipipili i lona afafine ma faaogaina le teine muli ma le lalelei o Leuteifuiono ina ia faaumatia Tamafaiga—ae ia ea le pologa o Fasitoo-uta ma Aana ma ola saoloto mai sauaga. Ua tapena lava e Maipipili lona afafine o Leuteifuiono i mea uma e ao ina fai, ae maise ia malamalama Leuteifuiono i le faaogaina o ia ina ia ola le nuu. Ua faatonu ma a'oa'i ma faalototele i mea mea uma e ao ona faatino e faatosina ai Tamafaiga ina ia mauafia le osofa'iga ua tapena, faatasi ma lona teine muli o le a tuuina atu ia Tamafaiga.

Na taunuu lava tapenaga uma na fuafuaina e Maipipili. Ua sau mai Manono le fuava'a a Tamafaiga o 'alia ma vaaalo e aga'i mai sisifo o le motu o Upolu faamoemoe e malaga i Laulii ma e ui mai lava i le aloalo e tau lalata mai i le apitagalu. O faiga masani ia o malaga a Samoa i ia ona aso i fuavaa, e ui taulalata mai i le apitagalu, auā foi e faigofie ona maua ai le fesoasoani pe a moomia, ae maise e faigofie ona tuta i uta i le eleele matūtū pe a oo ina soua tele le sami.

Ina ua aga'i mai le fuavaa a Tamafaiga ma lana aumalaga mai Manono ma oo tonu mai i gatai ane o le tolotolo i Matavai, na matua tosina le loto o Tamafaiga ina ua ia iloa mai i uta le tama'ita'i lalelei tele o Leuteifuiono o salusalu tuafale o le latou fale. Ua atili ai le momo'o o le loto o Tamafaiga i le tamaitai lalelei o Matavai ma Fasitoo-uta, auā ua faatautau lona foga, ua na o lona ofu e ufi ai le pito i lalo o lona tino momosi, ae faaaliali ona susu. O ni faiga faatosina ua matua iloga ona faaososoina ai uiga ma lagona tu'inanau o Tamafaiga ma ua le mafai ona ia taofiofia, ae maise o le isi lea vaega o le malosi o uiga leaga o Tamafaiga aga'i i tama'itai. O le tosina o le loto o Tamafaiga i le lalelei tele o le tama'tai, ua na le iloina ai o le osofa'iga lea ua fafau faasaga ia te ia lea e afua i faiga faatosina ia a Leuteifuiono.

O mana'oga tuinanau tele o Tamafaiga ina ua vaai ane i uta i le lalelei tele o Leuteifuiono na le faaauuina ai le malaga i Laulii ae tuta loa le fuavaa i Faleasi'u. Ona o le momo'o tele o Tamafaiga i tuinanau o faiga-aiga, na momoe ai lava ma fai-aiga ma se tama'itai o Faleasi'u i le tauafiafi o le aso lava lea ma le faamoemoe e faai'u i Fasitoo-uta e momoe ai le aumalaga, ma maua ai le laolao e fai-aiga ma Leuteifuiono. O le taunuu atu ai o Tamafaiga i Fasitoo-uta, o le isi vaega o le talimalo na

tapena e Ma'ipipili ma tagata o Fasitoo-uta mo le fafauina o le fasiotia o Tamafaiga, o le faia lea o se po-ula tele lava, o faafiatiaga o pese, o siva ua felafoa'i faatasi ma Tamafaiga ma le aumalaga, ma faaloaloa atu ai lava le po-ula i lona po atoa se'ia oo ina matuā tuneva le po. Ua faailoa foi ia Leuteifuiono le manao o Tamafaiga la te momoe i lona lava po ma ua tapena foi i ai le teine o Leuteifuiono. O lea lava ua foliga mai ua taoto lelei ma taoto i lagotonu fuafuaga uma a Maipipili mo le faaumatia o Tamafaiga.

I le tuana'i ai o le evaga o le po-ula, ua tuneva foi le po, ua vaivai foi Tamafaiga ma le aumalaga, ona mapu atu loa lea o Tamafaiga ma Leuteifuiono i le maota poo le api sã o Tamafaiga i le maota i Matavai. Ua mae'a ona teu lelei le tala o le fale ma toso pupuni i siapo e si'o ai le tala atoa o le maota, ua fola foi fala o tofaga o Tamafaiga ma Leuteifuiono, aua o le faamoemoe lava o lea po ia Tamafaiga, ia momoe faa-ulugalii ma Leuteifuiono lea ua nanau i ai lona tu'inanau. O le si'oina o le tala o le fale i siapo ina ia malu le momoe faaulugalii o Tamafaiga ma Leuteifuiono, ae mauafatia ai le osofa'iga a Ma'ipipili.

Ua faatino le osofa'iga

Ua iloa lelei e Aiono Maipipili e le gata ua alu le aso o malaga mai le fuava'a, sa momoe ma fai-aiga muamua i le afiatiaga o Tamafaiga ma se tamaitai mai Faleasiu, lea ua faaumiumi ona fai le faiga-siva o le po-ula, a'o lea foi ua toe momoe ma fai-aiga faalua Tamafaiga ia Leuteifuiono i le tuneva o le po lava lea, o lona uiga, ua matua gagase lava, ua gapelu ma vaivai si alii o Tamafaiga. Ua mautinoa ai e Maipipili, a osofa'ia i le mae'a ai ona fai-aiga ma malie lona tuinanau ia Leuteifuiono, o le a faigata ia Tamafaiga ona tali pe a osofa'ia, auā ua alu le malosi i le faiga-aiga ma Leuteifuiono. Ua atagia ai le to'a tele o Ma'ipipili ae maise o le toa o lona loto ma lona atamai pe a fua i le tapenaga o le osofa'iga faasaga ia Tamafaiga, ma ua faatalitali lava i le taimi sili ona tataua e faataunuu ai le osofa'iga.

I tua atu o pupuni siapo ua si'o ai le tala o le fale, ua uma foi ona fai-aiga Tamafaiga ia Leuteifuiono, ua na o le talitaliaga o le al'i ma taotooto, ua taumanavanava i le sela, auā ua alu le malosi i le mana'o tuinanau o le faiga-aiga, ae ua avea ai le teine muli o Leuteifuiono. A'o le taimi foi lea ua momoe vaivai le aumalaga uma auā ua alu le aso o malaga mai i le vasa, ua alu le aso o faafeao solo i lo latou alii o Tamafaiga, ua alu foi le po o fai le po-ula.

Ua fai mai le faailo e Leuteifuiono ua oo i le taimi tataua o le osofa'iga, auā ua na o le talitaliaga o Tamafaiga ua gapelu, ua vaivai lava. Ua osofa'i e Ma'ipipili le pupuni i le tala o le fale, malepe i lalo le pupuni siapo, velo sa'o loa le tao a Ma'ipipili ma taia tonu lava le itu tauagavale o Tamafaiga a'o ia taumafai e tu a'e i luga. A'o le taimi foi lea, ua osofa'i ma fafasi e taulele'a o Fasitoo-uta le aumalaga a Tamafaiga a'o momoe vaivai i latou. E aunoa ma se isi na mamate o fafau ma taupule se osofa'iga e faaumatia Tamafaiga.

O le faaumatia o Tamafaiga

E matuā tuga lava le manu'a o Tamafaiga ina ua taia tonu i le tao na velo ai e Ma'ipipili, ua alu le palapala o le manu'a, ae na ia mafai lava taumafai ese ma le fale e ui i le tuga ogaoga o lona manu'a. O lona tuga tele ua aga'i ai i tai ma oso loa i le sami. Manatua foi o Tamafaiga o se tagata tino ese, ma o le taimi lava na oso ai i le sami ona o ona tuga i lona manu'a na matua iloga ai ona pisi tele le sami, ma ua faaigoa ai o Lepisi le vaega lea o le fanua o Matavai ina ua pisi tele le sami ina ua tofi i ai Tamafaiga e tau saili sona lavea'i. Na tuli tataua e Aiono Maipipili ma maua atu lava, e tuga le augani mai o Tamafaiga i le fiaola ona o le tuga o lona manu'a, ae le i toe foi Maipipili, tasi lava le sasau i le to'i, alu ese mai ai le ulu o Tamafaiga mai lona tino. Ua faapea ona aumaia i uta lona tino ma ua ālaāla nini'iina ai.⁴¹ Ua faaumatia le fili, ua tagatavaleina ma fasiotia ia Tamafaiga. Ua a'e malo faiva o Aiono Maipipili, ua goa foi o ia o Tui'umi, le toa o Matavai ua ola ai Fasitoo-uta ma Aana uma.

O le fanua ua igoa o Lepisi

I le tuneva o le po lea na fasiotia ai Tamafaiga, ona o lona tiga tele i lona manu'a na oso ai i le sami ma na matua iloga ona pisi tele le sami. O le fasi fanua la lea na oso ai i le sami ia Tamafaiga ua faaigoaina nei o Lepisi, ma o se vaega o le fanua o Matavai. O le avea ai o Lepisi o se vaega o le fanua o Matavai ua faamaonia e le Faamasinoga o Talosaga Toe Iloilo o le Faamasinoga o Fanua ma Suafa o Samoa i lana faaiuga mamalu i le aso 20 Me 2009. O le mataupu autu (legal issue) sa sailia e le Faamasinoga mamalu poo ai tonu e ona le fanua, ma pulea le fanua o Lepisi i Fasitoo-uta.

O le faaiuga a le Faamasinoga o Talosaga Toe Iloilo ua faamaonia ai o le igoa o Lepisi e afua mai i le pisi tele o le sami i le fasi o Tamafaiga. Ua faamaonia ai foi e le Faamasinoga o Talosaga Toe Iloilo o le fanua o Lepisi o se vaeg o le fanua o Matavai ma e pulea e Aiono Faapologaina. O le Tusitala o lenei tusitusiga na taitai i le Itu Faamasinoga a sulii o Aiono Faapologaina.

Upu Faai'u

A fua i lona fanau mai, na mafua ona faaigoa ia Ma'ipipili ona o le tama e foliga e ma'i, toe pipili. Na fanau mai o se pepe lapo'a tele, ma na manatu lava le aiga ailoga e umi ni tausaga e ola ai ma avea o se tagata matua. Peitai, na sese uma ia manatu. Na ola mai Ma'ipipili o se tagata tino malosi, umi, lapo'a toe maua luga, na faaigoa ai foi o Tui'umi, o lona uiga, o le umi lava e gata ai umi. Na foi faatasi ma lona Tina o Tata i Fogapoa ina ua toe nonofo lona Tama ma le fafine Falelatai.

A'o lona toa, e le fefe, faatasi ma lona loto nu'u na tali mai ai Ma'ipipili i le tatalo atu a lona nuu o Fasitoo-uta ina ua matua ila, lailoa ma mapuitiga ona o sauaga a Tamafaiga. E le i faataga faia e Ma'ipipili le tapenaina o le faaumatia o Tamafaiga ina ia ola le nuu. O le upu moni, na sau lava e fai, ua ia fai lava ia mafai, ma ua mafai. O le faaumatia o Tamafaiga o se vaega taua tele o le tala faasolopito o Samoa auā ua faasaoina Fasitoo-uta, ua ola A'ana mai le pule sau ma le lē alofa o le aitu itulua o Tamafaiga.⁴⁷ Ua mate le tevolo, ae ua maua luga ai le tala'iga o le Tala Lelei i Samoa. Ua faaumatia Tamafaiga, ae ua faasaoina Aana ma Samoa uma. Ua faamauina nei le tala'aga o lē na ia faaumatia ia Tamafaiga nai lona sau tele—o ia lava lea, o Aiono Ma'ipipili, ua igoa foi o ia o Tui'umi

Notes

1. Savali o le Filemu- O le igoa lea o le va'a sa folau e le Misionare o Ioane Viliamu
2. O lenei talaaga sa faamaonia e le faaiuga a le Faamasinoga o Fanua ma Suafa - Gafa o Aiono and Ape: LC 815 P26 – P28 Mataupu: Suafa Aiono i Matavai/Fasitoo-uta. 26 April 2013.
3. O Matailili I Fasitoo-uta lea e tupuga atu ai le suafa matai lea o Aiono lea sa taua o le 'Paepae o Aiga' ae e le I vaevaeina e avea ma 'Itu Paepae o Aiga.'
4. O Taufanaifoia'ana o le afafine o Laumatiamanu Toleafoa o Safata ma Tutumanu Tagaloa-Fasavalu o Falelatai. Na taua I tala fa'asolopito o Falelatai o Taufanaifoia'ana sa soifua o ia I le vaiata o le 1600. O lana tama o Lilomaiava – le tama a le aitu ma le tagata o Palauli – o Tuita'alili, o tuaā o le aiga Tuimaleali'ifano i Falelatai. Sa soifua Lilomaiava mai le tausaga 1700 I le 1750.
5. Sa taua e Fofu Iosefa Sunia I lana saunoaga autu I le faalauiloaina o lana tusi fou: "O Aumoega ma Usuga a Tamalii Sāmoa' i SSAB/Apia I le aso 27 o Fepuari 2017, o Usuga ma Aumoega a Tamalii Sāmoa o se aganuu mamalu. E le gata e le tasi se aumoega, ae mafai ona sili atu nai le lua, ona o aga a tulafale, ae o le mamalu ina ia lautele ai gafa o aiga. O se isi vaega taua o le mamalu o le tele o usuga, o le toe momoli lelei o le tamaitai i lona nuu ma lona aiga."
6. O Aiono Lulu o le matai Fasitoo-uta I le vaiata o le pulega a Tamafaiga.

7. Sa umia e le Susuga Aiono Leulumoega Sofara le suafo Aiono Tuala Faapologaina o Matavai/Fasitoo-uta mai le 1982 – 2010.

References

A. M. Tuimaleali'ifano, 2008. *O Tama-a'Aiga*, Institute of Pacific Studies, USP, p. 49

Faamasinoga o Talosaga, Faamasinoga o Fanua a Suafo Sāmoa. LC 5437 P1 – P7

Interview with Leusogi Taalo 09 September 2017. O Leusogi o le Tu'ua o le Falefitu i Mata- Avano-Fasitoo-uta.

Interview with members of the Aiono Tuala family in Matailili/Fasitoo-uta

LC 5437 P1 – P7 'Ua faamaonia o le fanua ua finau ai o se vaega o Lepisi e pule ai le suafo Aiono Faapologaina.

LC 5437 P1 – P7 MATAUPU NA SUESUEINA: 'E uiga i le pule o le fanua o LEPISI i Fasitoo-uta.

Meleisea, M. (1987) 'Lagaga' A Short History of Sāmoa.

Meleisea, M. (1987) 'The Making of Modern Sāmoa' (Institute of Pacific Studies of the University of the South Pacific.) 23

R. P. Gilson, 1970. *Sāmoa 1830 to 1900, the politics of a multi-cultural community*, Melbourne, OUP, 71

Sunia, F. (2016) 'O Usuga ma Aumoega a Tamalii o Sāmoa.' (International Multimedia Inc.) 213

Tu'u'u, M. (1999) 'Malietoa, Superior Warrior of Sāmoa' (GP Print, Petone, NZ) 203

Tuiatua Tupua Tamasese Efi, (1995) 'Suesue Manogi' in Search of Fragrance, (Centre for Sāmoan Studies, National Univerity of Sāmoa, 2008) 45.

Vaega 4 (4.1) o Mafuaaga o le Faaiuga. 'Ua matauina le mafuli o mau i le lagolagoina o le taofi e faapea faato'a mau ai le igoa LEPISI ma faaigoa ai le tolotolo leni o loo ogatotonu i ai nei feinaua'iga, ina ua uma le fasiga o Tamafaiga. LC 5437 P1 – P7